



Publicaziuns dalla vischnaunca, jamna 13

Damondas da baghegiar

2017-1019.000

Datum dalla publicaziun: Ils 31 da mars 2017

Ils patrons: Marcus e Georgina Berther-Janka Via Buretsch 11 7186 Segnas

Il representant: Marcus Berther-Janka Via Buretsch 11 7186 Segnas

Object: Vetrificaziun dil balcon, parcella 400, Via Buretsch 11, 7186 Segnas

2017-1020.000

Datum dalla publicaziun: Ils 31 da mars 2017

Il patron: Thomas Monn Wachterweg 3 8057 Turitg

Il representant: maurusfrei Architekten AG, Rätusstrasse 23 7000 Cuera

Object: Construcziun d'ina casa d'ina famiglia, parcella 787, Via Veglia 1, 7180 Disentis/Mustér

2017-1021.000

Datum dalla publicaziun: Ils 31 da mars 2017

Ils patrons: Marco Paulo Maio Martins ed Andrea Maria Figueiredo Da Conceicao, Via Gonda 28 7180 Disentis/Mustér

Il representant: Giovanni Sabbadini-Giger, Via Sogn Gions 15, 7180 Disentis/Mustér

Object: Sanaziun ed izolaziun dalla casa, parcella 666, Via Gonda 28, 7180 Disentis/Mustér

Ils plans da construcziun ein deponi tier l'administraziun communal.

- L'envesta publica cuoza 20 dis dapi il datum dalla publicaziun.
- Eventualas protestas encunter sura damonda da baghegiar ein d'inoltrar a scret enteifer 20 dis all'istanza da baghegiar, caum postal 57, 7180 Disentis/Mustér. La protesta sto esser motivada e suttascretta dil recurrent ni da siu representant. Disentis/Mustér, ils 28 da mars 2017

Uffeci da baghegiar Disentis/Mustér

Cussegl da vischnaunca

Rapport dalla seduta dils 24 da mars 2017

En sia seduta dils 24 da mars 2017 ha il cussegl da vischnaunca sut il tgamun da Christoph Berger tractau pliras fatschentas.

All'entschatta dils onns 1970 ha il turissem a Mustér priu ina nova dimensiun cun la construcziun dal-las pendicularas e dil hotel «Acla da Fontauna». Ord quei catsch ei l'idea d'ereger il Center da sport e cultura (CSC) ton per indigens sco per hosps naschida. Dapi sia construcziun ei il CSC carschius ad in impurtont e bein frequentau liug da sentupada e recreaziun da renum regional. Oz surveschan las localitads ad occurrenzadas da sport, cultura ed occurrenzadas economicas sco era allas scolass ed uniuns. Il CSC ei era in zun impurtont element dalla purschida turistica sisum la Cadi. Quella impurtanza vegn a crescer ils proxims onns. La purschida dil Center da sport e cultura ei d'ina vart in survetsch ad indigens e hosps da vacanzas che tscherchan il liug per lur activitads e per recreaziun. Da l'autra vart fuorma la gronda purschida era ina specia da prevenziun. Affons, giuvenils e carschi che cattan cheu in'activitad prudenta san haver ina gronda muntada da prevenziun concernent prighels d'alcohol e drogas. Ussa s'enter varga 45 onns drova ei ina sanaziun e renovaziun dil CSC. Il cussegl da vischnaunca ha abolii il credit restont ch'era vegnius concedius l'entschatta 2015 per in project cumplessiv e concediu in credit da frs. 375 000.– per projectar la sanaziun e completaziun dil Center da sport e cultura.

Tier tut ils indecis buca legrevivels muossa il svilup da nossa vischnaunca tendenzas positivas. Aschia s'augmentan p.ex. las naschientschas e schegie ch'ins aveva quintau cun ina reducziun massiva sil sector da construcziun, semova il svilup sin quei sector da maniera legrevivla. In svilup meins legrevivels ei denton che las pretensiuns davart dil stadi sil sector digl ambient e dalla planisaziun dil territori ein s'augmentadas considerablamein ils davos onns ed occupeschon las vischnauncas cuntinuadamein. Las vischnauncas ein confruntadas cun numerusas midadas ed ei pretenda dad esser attents sch'ins vul buca munchentar ina posiziun u l'autra. Per saver ademplir tut las incaricas pretendidas, drova ei era avunda personal qualificau. Il cussegl da vischnaunca ha acceptau la revisiun parziala dil regulativ pil personal e creau in'ulteriura piazza tier igl uffeci da baghegiar e survetschs technics. Plinavon ei



vegnu creau ina tiarza piazza da mussadra da scoletta per dus onns ed alzau il pensum da pedel da scola da 135 sin 150%. Il cussegl da vischnaunca ha plinavon concediu in credit da frs. 342 000.– per la cumpra d'ina parcella cun ina surfatscha da 6839 m2 ella zona da mistregn Pignola/Marias.

Schegie che la davosa revisiun parziala dalla planisaziun locala ei aunc buc approbada cumpleina-mein dalla regenza (zona d'ennevar), suondan gia ulteriuras damondas concernent la planisaziun locala. Las zonas da prighel tenor carta da prighel ston vegnir surpridas el plan da zonas e plinavon era ils spazis d'aua. Quellas midadas han per consequenza ch'ils cunfins dallas zonas da baghegiar per liung da nos uals ston vegnir currigi. Ulteriuramein setracta ei da metter en damonda la surfatscha dallas zonas da baghegiar. Plinavon eis ei necessari da sefatschentiar cugl art. 8 dalla lescha federala davart habitaziuns secundaras (ZWG) – midada da hotels en habitaziuns.

Per che la cumissiun da planisaziun sappi entscheiver ton pli spert cun sia lavur, ha il cussegl da vischnaunca eligi suandontas personas ella cumissiun da planisaziun:

- Mario Flepp, Christian Loretz, Livio Zanetti, cussegliers
- Aluis Flepp, president Corporaziun d'aua Spina da Vin
- Aluis Huonder, architect
- Iso Mazzetta e Robert Cajacob, suprastonza communal

Suprastonza communal

Referendum facultativ

A caschun da sia seduta dils 24 da mars 2017 ha il cussegl da vischnaunca approbau in credit da projectaziun da frs. 375000.– per la sanaziun e completaziun dil Center da sport e cultura sco era in credit da frs. 342000.– per la cumpra dalla parcella 188, plan 2 cun ina surfatscha da 6839 m2 ella zona da mistregn a Pignola.

Conform ad art. 21, lit. c ed f dalla constituziun communal ein quellas decisiuns suttamessas al referendum facultativ. Ils messadis tier sura fatschentas ein exponi per investa en casa communal (stanza nr. 10).

Enteifer 20 dis dapi la publicaziun officiala han 80 votants la pussevividad d'inoltrar enviers sura conclus il referendum e pretender ina votaziun dil pievel.

Suprastonza communal

Serrada dalla via Cavardiras

Tschancun Brulf entochen tier il dutg da Caprau

Igl uffeci cantunal da construcziun bassa dil Grischun preveda ina sanaziun generala dalla via da comunicaziun a Cavardiras.

Duront las lavurs da construcziun sto la via vegnir serrada per scadin traffic sil tschancun Brulf entochen tier il dutg da Caprau.

Las lavurs da construcziun entscheivan suenter Pastgas e cuozzan entochen la fin d'uost 2017. In urari detagliau dalla serrada suonda pli tard.

In'untgida ei pusseviva sur la via da comunicaziun Pardomat–Cavardiras per vehichels entochen 11 t.

Per pedunzs e velocipedists ei il passadi adina pusseivels. Per ulteriuar sclariment san ins sevolver tiel responsabel digl uffeci da construcziun bassa dil cantun, Pius Cavegn, telefonin 079 334 74 14, ni tiel menader digl uffeci da baghegiar, Ervin Maissen, telefon 081 920 36 46. Bien engraziament per Vossa capientscha.

Disentis/Mustér, ils 20 da mars 2017

*Uffeci da construcziun bassa dil Grischun, district 6
Pius Cavegn*

*Uffeci da baghegiar dalla vischnaunca da Mustér
Ervin Maissen*



Sendas e via Runfoppa

Muort lavurs da transports da lenna cun suga e camiun a Runfoppa, vegnan la via e las sendas ella vischinonza dalla suga serradas naven dils 3 entochen ils 21 d'avrel 2017 per tut traffic. Per transports urgents duront quei temps ein ils proprietaris da terren supplicai da s'annunziar tiel selvicultur, Simon Cathomen (079 832 02 63). Igl access per pedunzs sur la via veglia da Runfoppa naven da Faltscharidas–Pégn Rodund–Runfoppa Sura ei garantius da tut temps.

Nus supplichein da prender enconuschientscha da quest avis. Bien engraziament per la capientscha. Disentis/Mustér, ils 31 da mars 2017

Uffeci forestal Disentis/Mustér

Deponia da verd e caglias a Raveras

Dapi igl atun vargau ei vegniu constatau sin la deponia da rufids organics (fein, pastg, restonzas d'iert) e caglias a Raveras ch'ei vegn deponiu cuntinuadamein tschendra ed auters rufids buca lubi sin la deponia.

La tschendra cuntegn meinsvart burnida ed effectuescha aschia adina puspei incendis alla deponia. Nus supplichein la populaziun da setener vid igl uorden indicau e da desister da deponer materials buca lubi ni materials che san caschunar incendis ni auters donns.

Suprastonza communal

Mortori

Leo Jacomet-Schwarz, naschius ils 7 da settember 1932, morts ils 24 da mars 2017

Novas purschidas per senioras e seniors el Puntreis Center da sanadad SA a Mustér

La vischnaunca dispona d'in post da cussegliaziun per senioras e seniors. El ei vegnius realisau dalla vischnaunca da Mustér en connex cun il project Seniora-CA e cun la Pro Senectute. Il post se-sanfla el Puntreis Center da sanadad SA.

Sclariment per damondas en connex cun il tema vegliadetgna survegnis Vus mintgamai naven da gliendisdis entochen venderdis dallas 8.00–12.00 e dallas 13.30– 16.30, e quei per telefon sut 081 929 56 56 ni directamein el Puntreis.

Per in termin cun la Pro Senectute essas Vus supplicai da contactar il menader dil post da cussegliaziun dalla Pro Senectute, e quei sut la numera da telefon 081 925 43 26. El ei mintgamai presents a Mustér la tiarza gievgia dil meins.

Bugen stein nus a disposiziun per Vossas damondas.

Puntreis Center da sanadad SA

Rimnada da pupi

Venderdis, ils 21-4-2017

Adatg! Ei vegn mo rimnau: gasettas, illustradas, catalogs, cudischs e prospects stampai.

Il pupi sto vegnir deponius sper via (sche pusseivel in di avon). Igl ei impurtont da ligiar bein il pupi e da buca far memia gronds pacs. Engraziel.

Nus rimnein buca cartun. Quel sa vegnir deponius a Raveras igl entir onn ora, e quei las mesjamnas (16.00–17.30) e sondas (10.00–12.00).

Bien engraziament per Vies agid e sustegn!

Scolas Mustér, Ch. Berger



Uniun da dunnas Disentis/Mustér

Suentermiezdi da Pastgas

Cordialmein envidein nus tut ils affons cun accumpignament a far lieurs da Pastgas ord pasta. Sil-suenter dat ei stiva da caffè e pettas.

Datum: **Mesjamna, ils 5 d'avrel 2017**, 14.00

Liug da sentupada: Avon la porta (Pforte) dalla Claustra

Parcadis: Stattan a disposiziun gratuitamein davos la claustra (Via Sogn Sigisbert).

Annunzias prendin bugen encunter entochen ils 2 d'avrel 2017 sut: darinka.cajacob@hotmail.com ni 076 471 83 18. Sin Tia participaziun selegnan

las menadras dil ressort affons

Secziun da catschadurs Péz Alpetta

Radunonza da tgira, venderdis, ils 7 d'avrel allas 20.15 ella «Cucagna». Cordialmein envida

la suprastonza

Corporaziun d'alp Nalps e Tegia miez, Segnas

Radunonza generala, sonda ils 8-4-2017 allas 20.15 ell'ustria «Cresta» a Segnas. A stedia participaziun envida la suprastonza. Suenter radunonza vegn offeriu in pign puschegn.

Uniun samaritana Mustér

Cuors: Agid d'urgenza tier affons pigns (Notfälle bei Kleinkindern), sonda, ils 22 d'avrel 2017 13.00–17.00 en casa da scola, Mustér. Il cuors sedrezza a mummas e babs, tattas e tats ed a tut

las personas che han da far cun affons pli pigns ed era pli gronds. Ulteriur sclariment ed annunzias entochen ils 9 d'avrel 2017 tier Letizia Schmed, 079 486 41 92, leti.schmed@miumail.ch

Corporaziun d'aua Spina da Vin, Disentis/Mustér

La radunonza generala dalla Corporaziun d'aua Spina da Vin ha liug mardis Pastgas, ils 18 d'avrel 2017 allas 20.15 el restaurant «Cucagna», Disentis/Mustér

Tractandas

1. Beinvegni
2. Elecziun da dus dumbravuschs
3. Protocol, approbaziun
4. Rapport dil president
5. Rendaquen, rapport dils revisurs e dar scarica
6. Projects
7. Preventiv e program da lavur
8. Elecziun dil president
9. Orientaziuns
10. Varia



Suenter la radunonza vegn offeriu in mudest refrestg. Tuttas commemoras e tuts commembers ein cordialmein envidai e beinvegni.

Per la suprastonza, il president Aluis Flepp

Producziuns finalas – Movis

Las endisch gruppas d'affons, giuventetgna e carschi da Mustér e las vischnauncas vischinontas presentan lur choreografias ch'ellas han exercitau duront igl onn da sault 2016/17.

Cu? **venderdis, ils 7-4-2017**, allas 20.00

sonda, ils 8-4-2017, allas 20.00

dumengia, ils 9-4-2017, allas 14.00

Nua? Halla Cons/Mustér

Tanzaufführung – Movis

Die elf Kinder-, Jugend- und Erwachsenengruppen von Disentis und Umgebung präsentieren ihre Choreografien, die sie während des Tanzjahres 2016/17 einstudiert haben.

Wann? **Freitag, 7.4.2017**, 20 Uhr

Samstag, 8.4.2017, 20 Uhr

Sonntag, 9.4.2017, 14 Uhr

Wo? Halle Cons/Disentis

Vegni e mirei! Da Vossa viseta selegran

ils Movis
